

《大乘起信論導讀》 補充講表

◎附表十一：糅合《大乘起信論裂網疏》、《大乘起信論疏記會閱》、《大乘起信論旨要略示》

○猶如迷人，依方故迷；若離於方，則無有迷。

◆東西定方，以喻真如。如其定方而正了知，以喻覺義。迷東為西，以喻不覺妄念。

方非迷悟，為迷悟依。

※《大乘起信論裂網疏》卷二云：「問：譬如迷方，須人指示；眾生無始已來，從未曾悟，

則最先一佛，仗誰指示？答：約真如門，尚無成佛與不成佛，何有先後！約生滅

門，則譬如曠野迷方，無人可問；但當諦觀日影去來之相，便識東西。眾生亦爾，

若能諦觀生老病死之相，便能覺悟。故紫柏大師云：【最先一佛，以苦諦為師也】。」

○以有不覺妄想心故，能知名義，為說真覺。

◆此「真覺」字，即指究竟始覺言之；始覺合本，無復本始之異。


◆一、無明為因生三細。二、境界為緣長六粗。

○一者、無明業相：以依不覺故心動，說名為業；覺則不動，動則有苦，果不離因故。

◆以依無明不覺而動，名之為業；心即證自證分，業即自證分也。覺則契會真如，故不動。

不覺而動，則當體便是果報苦法。由動為因，顯心苦果。故唯識論以第三自證分為能量，

第四證自證分為量果；如鏡面鏡背，兩不相離，故云：果不離因也。



○二者、能見相：以依動故能見，不動則無見。（即見分）

◆二能見相：即心王心所現行起時，必有見分，能見於境。唯不動，則無見耳；動即有見，

非先動而後見也。

○三者、境界相：以依能見故，境界妄現，離見則無境界。（即相分）

※《大乘起信論裂網疏》卷二云：「夫唯不覺，故舉真如全體，而為心心所之各各三相。

若能覺知三相無相，唯一真如，則一切心心所之業相，即真如體；一切能見，即真如相；一切境界，即真如用。故前文云：若有眾生，能觀一切妄念無相，則為證得如來智慧也。二約現前觀照釋者，若觀一切妄念無相，則一念相應一念佛，念念相應念念佛，即名為不放逸，即名為覺。所謂具縛凡夫，能知如來秘密之藏。雖是肉眼，即名佛眼，並無三相六相，可以當情。」

○以有境界緣故，復生六種相。云何為六？

◆境界唯是自心心所相分，故名虛妄。所謂依他起性，如幻事也。以此為所緣緣及增上緣，復生六相。能生既是虛妄，則所生相，豈有實哉！然前三相，通於八識及諸心所，以心所，定各有四分故。此下六相，則有局有通也。

○一者、智相：依於境界，心起分別，愛與不愛故。

※《大乘起信論裂網疏》卷二云：「智相，即別境中之慧心所也。此相唯與前七相應，第七但緣第八見分，計為實我實法。生於愛心，愛即根本煩惱中之貪也。

第六遍緣三界一切境界，遍起愛非愛心；愛即是貪，非愛即瞋。前五各緣現在一塵境界，各起愛非愛心。然此智相，亦全攬真如為體；與前覺義，毫無差別。若能了達智無智相，即為證得如來智慧矣。」

○二者、相續相：依於智故，生其苦樂覺心，起念相應不斷故。

※《大乘起信論裂網疏》卷二云：「相續有二義：一、約心所，即受與念、定。苦樂覺是受，由念故不忘，由定故專注也。二、約心王，即等無間意根。由智及念，助彼心王相續而起，假立前念已滅，心王名為意根；然第八第七，從無始來，法爾相續，不依於智。前六相續，並依智起，故云：相應不斷也。」

○三者、執取相：依於相續，緣念境界，住持苦樂，心起著故。

※《大乘起信論裂網疏》卷二云：「執取：即別境中勝解心所，及貪瞋慢等任運諸煩惱也。

大凡一剎那心，生已即滅，無執著義。由其前後相似相續，乃有執著功能，此相唯是第六識有。以七八兩識及前五識，唯緣現在一剎那境，無執著故。

然如實觀之，能執著者，即第六識見分，所執著者，即第六識相分。」

○四者、計名字相：依於妄執，分別假名言相故。

◆此即四不定中，尋伺心所，及根本中五見等煩惱也。亦唯在第六識，然能執者，亦即見分。剎那生滅，無能執義。所執者，即若名若義，自性差別。

○五者、起業相：依於名字，尋名取著，造種種業故。

○五、起業相：謂依執名等，起於種種諸差別業。（實又難陀大師所譯）

◆能起業者，即第六識相應之思。所起之業，通前五識。言差別者，或起惡業，或起善業，

或禪定業，即是三界諸有漏業；乃至出世無漏業，菩薩利他業，皆名起業相也。

○復次，覺與不覺，有二種相。云何為二？一者、同相，二者、異相。

◆前明阿賴耶識有二種義，所謂覺與不覺，今故約此辨同異也。真如不變隨緣，既舉體而為阿賴耶識，即舉體而為覺與不覺。覺與不覺隨緣不變，既舉體依於阿賴耶識，即舉體便是真如。

○言同相者，譬如種種瓦器，皆同微塵性相。如是無漏、無明，種種業幻，皆同真如性相。

◆無漏，即指覺義。無明，即不覺義。種種幻用，雙指依無漏智所起不思議用，及依無明所起三相六相也。

○亦無色相可見，而有見色相者，唯是隨染業幻所作，非是智色不空之性，以智相無可見故。

◆若約同相，定無色相可見者。如何現有色相可見，亦見如來種種色相。釋曰：當知皆約生滅門中，隨染幻用，見有差別色相，非謂真如門中智色不空之相，亦可見也。